

OCCURRENZAS

Savognin: sonda è l'elecziun dalla «Miss Südostschweiz» agl Cube

Plazs angal per la prova principala

● **pb.** Sonda proxima eligia ena giuria aint igl Cube Hotel a Savognin la «Miss Südostschweiz 2009». Igl antier event è er organiso dad ena donna da Savognin tgi è responsabla per mintga decisiun, per mintga stretg e per mintga detagl: Conny Moser Holdener.

«Ossa è dapertot anc da reglar igls pitschens detagls an connex cun giaveischs da sponsors etc. Schiglio sunga pronta», dei Conny Moser, ossa igl sagond onn responsabla dalla Südostschweiz Media per l'elecziun dalla miss. Ella seia ossa gio en mez onn vedlonder e chegl dasperas la sia lavour scu manadra dalla tgesa editoura. Chella lavour sa concentrescha principalmaintg sen las fegns d'emda ed igl davos taimp seia ella stada savens ansemen cun las finalistas. Chegl tgi ella giaveischa anc anfignen sonda proxima seia en gnuol quietezza per las mattas. Per ella sez vignigl glez strousch a dar.

Gio dadei vandia or

Gl'è chest onn igl ampren onn tgi la Miss Südostschweiz vign eligida a Savognin. Igl Cube Hotel Savognin, Savognin Turissem e Savognin Penticularas furma igl patronat digl event.

L'elecziun scu tala è ainten la halla digl Cube. I antscheva la sonda seira allas 19.30 cun igl apéro per giasts ed igls VIP's, allas 20.00 ins vo segls plazs ed allas 20.15 antscheva igl event. An tot è ca. 400 posts, pero gio dadei dattigl nigns plazs ple. Tot è vandia or. «la survign anc mintga de telefons per ampustar plazs, ma ia stò desillusiunar igls interessos», dei Conny Moser. En'andrada per l'elecziun costa digl reminent 39.– fr. Cun igl apéro ed ena tschagna e parti ansemen cun las finalistas siva l'elecziun costigl 68.– fr.

Damais betg bunas novas per tots chels e chellas tgi fissan gugent stos dalla parteida. Tuttegnna dattigl per tots chels anc en pitschen confiert: dumang venderde, igls 4 da settember allas 19.00 è la prova principala. «Cò gainsa tras l'antiera seira 1:1 cun televisiun cun



Conny Moser (davos da mez), la organisatoura e responsabla per l'elecziun dalla Miss Südostschweiz cun las diesch finalistas.

la reschia, cun la moderaziun, cun la choreografia dallas finalistas etc. Simplamaintg sainza la giuria. E lezza seira ins pò neir a vurdar e tadlar», dat Conny Moser anc en setgerign.

Bung cun igls sponsors

L'organisaziun per l'elecziun dalla Miss Südostschweiz è ena tgossa tgi dovra bler taimp e tgi caschungia er costs. Igl event stò pero alla finala sa purtar sasez. Uscheia ò Conny Moser er dad eir sen la tschertga da sponsors. Pero tiers crisa economica seia chegl mainc sto schi grev. Igl onn passo

ins vegia gia en fitg bung resung cun igl event tigl sponsors. Chels seian tots turnos ed anc differents oters vetiers.

Er las mattas tgi è aint igl final von betg a tgesa cugls mangs veids. La nova Miss Südostschweiz dastga chintar cun prietschs an ena somma totala da ca. 40'000.– fr. Pero er per tot las otras dettigns bels prietschs e per l'egna u l'otra sa dervan portas tgi dettan occasiun dad eir ena veia tgi fiss schiglio betg sto pussebel dad eir.

Sen la dumonda a Conny Moser, schi ella vegia ena favorita, dei ella decideidamaintg na. I detta

nignas favoritas. Chegl dependa scu tgi mintgna sa preschainta chel de. I dependa er dalla giuria ed i tanscha betg angal dad esser bela: la sonda seira allas 16.00, ordvart l'occurrènta scu tala, dattigl anc en discurs u ena intervista dalla giuria cun las finalistas. Ed er chegl chinta cun tot igls oters criteris tgi igls commembers dalla giuria on da risguardar.

Dus indigens ainten la giuria

Per Conny Moser ègl sto impurtant tgi ainten la giuria seian er persungas indigenas. Gl'è chegl eneda Markus Comploj, igl directer da Savognin Turissem tgi represchainta igl patronat. E la sagonda persunga è Adriano Iseppi. «la sung stada cun el a scola ed antras las sias activitads tar Swiss Ski è el ena persunga ancun- aschainta».

Nignas finalistas da Surmeir

La seira dalla elecziun Miss Südostschweiz cun tot las sias shows vign moderada da Claudio Minder e da Sereina Venzin.

Dallas diesch finalistas èn set Grischunas. Da chellas pero betg ena suletta Surmirana. Chellas tgi èn igl pi manevèl vignan egna da Tavo, egna da Rongellen ed egna da Rodels. La vigliadètna dallas finalistas è tranter 19 e 24 onns.

Dasperas Conny Moser, tgi magna igl antier project dall'elecziun dalla Miss Südostschweiz ed igls dus indigens tgi sesan ainten la giuria da nov persungas, on anc dus otras persungas ena rolla impurtanta durant la seira. Chegl èn igls dus unfants Lea e Jonas tgi èn igls schinumnos unfants dallas flours. Els surdattan las flours a mintgna dallas finalistas cura tgi chellas sa preschaintan ainten igl vistgia da gala.

Damais sonda proxima è la gronda show ainten la sala digl Cube a Savognin. E da chella sortescha egna dallas diesch finalistas scu victoura e porta per en onn igl tetel «Miss Südostschweiz». Durant chel onn varo ella bleras incumbensas e represchaintaziuns. Digl reminent èn las amprenas treis qualifitgeidas automaticamaintg per igl casting dalla Miss Svizra.